

09 JUL 2004

Umno-Razaleigh

TENGGU RAZALEIGH UMUM MAHU BERTANDING JAWATAN PRESIDEN UMNO

Oleh: Roslan Ariffin

GUA MUSANG, 9 Julai (Bernama) -- Keghairahan menjelang pemilihan Umno September depan meningkat hari ini dengan pengumuman veteran parti Tengku Razaleigh Hamzah bahawa beliau mahu bertanding jawatan presiden parti itu.

Tengku Razaleigh ketika membuat pengumuman itu di hadapan kira-kira 1,000 anggota perwakilan Pemuda dan Wanita Bahagian Gua Musang pada persidangan mereka di sini, berkata beliau mengambil keputusan menawarkan diri untuk jawatan tertinggi parti itu bagi "menghidupkan amalan demokrasi selain membolehkannya meneruskan perjuangan kepada parti".

Bekas Menteri Kewangan itu berkata kini terpulang kepada bahagian-bahagian Umno yang sedang bermesyuarat sama ada untuk mencalonkan beliau.

Untuk membolehkannya layak bertanding jawatan presiden, Tengku Razaleigh perlu mendapat 30 peratus pencalonan daripada 191 bahagian yang bermesyuarat sehingga 22 Julai ini.

Sambil mendapat sorakan dan tepukan gemuruh daripada perwakilan, Tengku Razaleigh berkata: "Jadi hari ini pada hari yang baik, di bulan yang baik, di hadapan saudara dan saudari ini dan atas desakan dan permintaan ramai terutama sekali sahabat handai, saya rasa tidak keterlaluan kalau saya dicalonkan jawatan presiden.

"Sekiranya mencukupi bilangan (pencalonan) yang ditentukan oleh pelembagaan parti saya sedia menimbang untuk menerima pencalonan itu.

"Dengan doa supaya diberi taufik dan hidayah, saya diberi kekuatan dengan dibekalkan ilmu yang cukup untuk saya melangsungkan perjuangan bagi pihak orang Umno."

Sebaik beliau membuat pengumuman itu, dewan tempat berlangsung mesyuarat itu di Bukit Chekati di sini bergema dengan laungan "Hidup Ku Li" sebanyak tiga kali oleh penyokongnya yang juga menjulang beliau.

Tengku Razaleigh, yang juga Ketua Bahagian Gua Musang dan anggota Majlis Tertinggi (MT) Umno yang dilantik, berkata beliau sanggup

membuat
perisytiharan itu kerana "jawatan itu kosong".

"Jawatan (presiden) ini masih kosong dan pihak yang bertanggungjawab menentukan jawatan ini ialah ahli-ahli Umno menerusi persidangan perwakilan bahagian-bahagian di seluruh negara.

"Lagipun, setahu saya, belum ada orang yang membuat tawaran untuk jawatan itu selain saya sekarang ini. Saya berharap saya akan mendapat sokongan daripada bahagian-bahagian sekiranya mereka fikir saya layak dan sesuai.

"Kalau difikirkan saya tidak layak, apakah daya. ini sekadar tawaran untuk berkhidmat dari seorang yang sudah lama dalam parti tetapi tidak berjawatan, tetapi masih penuh bersemangat untuk membela Umno." katanya.

Perdana Menteri datuk Seri Abdullah Ahmad Badawi kini memegang jawatan presiden Umno ekoran persaraan Tun Dr Mahathir Mohamad Oktober lepas.

Khamis lepas, Tengku Razaleigh mencadangkan supaya sistem kuota pencalonan jawatan dalam Umno dimansuhkan, dan mengumumkan kesediaannya bertanding bagi mana-mana jawatan tertinggi parti.

Ekoran itu, pelbagai pihak, termasuk Menteri Luar Datuk Seri Syed Hamid Albar dan Menteri Besar Terengganu Datuk Idris Jusoh, memintanya bertanding jawatan Naib Presiden yang dirasakan lebih sesuai baginya.

Tengku Razaleigh, 66, pernah menjadi Naib Presiden Umno pada 1975 pada usia 29 tahun dan mempertahankan jawatan itu pada 1978 hinggalah pemilihan parti 1981.

Beliau mencabar Dr Mahathir bagi jawatan presiden parti pada pemilihan 1987 tetapi tewas tipis dengan Perdana Menteri ketika itu memperolehi majoriti hanya 42 undi.

Sejak itu, jawatan presiden Umno tidak pernah ditandingi.

Tengku Razaleigh juga pernah tewas dua kali kepada Tan Sri Musa Hitam bagi jawatan Timbalan Presiden pada 1981 dan 1984.

Tengku Razaleigh pernah meninggalkan Umno untuk menubuhkan Parti Semangat 46. Apabila parti itu dibubarkan, beliau kembali ke pangkuan Umno.

Ketika membuat pengumuman mahu bertanding sekali lagi untuk jawatan

presiden Umno -- yang pemegangnya secara tradisi adalah juga Perdana Menteri Malaysia -- beliau berharap perkembangan terbaru itu tidak akan menimbulkan pelbagai tafsiran dan sebaliknya semua pihak perlu menghormati semangat demokrasi dalam parti dan menyerahkan kepada anggota parti untuk membuat keputusan.

Tengku Razaleigh berkata semua pihak juga perlu menerima sebarang keputusan yang dibuat oleh anggota Umno dengan "semangat kekeluargaan dan tidak perlu ada perasaan marah, perasaan dukacita dan bermasam-masam muka. Inilah harapan kita, inilah keluarga besar kita, Umno".

"Kerana saya tak ada niat lebih daripada ini. Kalau dapat disokong, sokonglah, kalau tak dapat disokong, tak usah sokong. Tak ada paksaan, tak ada nak melobi," katanya.

Beliau berkata kenyataannya itu juga dapat menjelaskan segala kekeliruan dan pelbagai andaian yang dibuat selama ini menerusi media termasuk daripada kalangan rakan-rakannya dan pemimpin politik parti.

"Saya sebenarnya tidak mahu membuat kenyataan ini tetapi sebagaimana yang saya kata tadi, sekiranya ada pencalonan, sekiranya saya difikir layak dan sesuai, maka saya sedia menimbang untuk menerima pencalonan itu jika ia cukup.

"Terpulanglah kepada saudara-saudari. Saya tak dapatlah melebihi dari itu kerana saya bukan ada apa-apa, saya sebatang kara. Saudara-saudarilah kekuatan saya untuk maju ke depan bagi kepentingan orang Melayu dan saya sendiri," katanya.

-- BERNAMA

RAR AU AU